

東
華
續
錄

東華續錄

乾隆一百十九

臣王先謙敬編

臣周澍蕃恭校

乾隆五十九年甲寅春正月庚寅免直隸山東河南三省節年因災緩徵銀兩十分之三○壬寅命於陝西藩庫支銀六萬四千八百兩發商人生息每年搭解伊犁賞給察哈爾兵丁公用○癸丑軍機大臣兵部議覆閩浙總督伍拉納奏遵旨查勘珠山卽舟山距定海縣城五里對岸有島一座名五奎山隔洋面六里峰勢高出眾山全洋島嶼俱可瞭望且外洋船隻前赴定海者皆於此停泊實爲扼要請添設一汛卽於定海鎮標中左右三營內抽撥水師兵五十名派千總一員率領駐紮並撥駕營船往來巡哨以資防守應如所請但此項兵丁若令常川駐紮恐日久怠玩應令照

汎舟戍兵之例每屆半年輪換一半從之

二月庚申諭我國家重熙累洽 列聖相承薄海昇平遐荒賓服

朕纘膺統緒荷蒙 昊蒼篤祐於今五十九年猶日孜孜無時不

以敬 天勤民爲念乾隆五十五年屆朕八旬壽辰因內外大小

臣工再三籲懇舉行慶典會降旨允其所請並飭令黜華崇實毋

得過事虛糜明年乙卯正屆臨御六十年國慶中外臣工卽有以

福祚延長史冊罕觀宜舉行慶典爲請者朕初亦以國慶駢蕃王

大臣等抒忱奏懇難以固行拒卻今思乙卯元旦適逢日食近復

查是年上元又值月食之期雖日月薄蝕躔度本屬有定數十百

年前皆可推算而得所謂千歲之日至可坐而致者但以新正一

月之閒朔望俱有虧食此正 上天垂象示儆之意且京師自上

年冬初得雪迄今未霽祥雲朕盼澤焦勞虔誠祈禱尙未得邀渥

澤推求其故或卽此欲舉行慶典之一念已近乎滿假以致不能
感召休和而明正朔望適有日月虧食之事不可不彌懷寅畏亟
思修省所有乙卯年慶典著毋庸舉行是年八月朕仍駐蹕熱河
不復照五十五年之例先期回京受賀庶幾改過不吝若過而不
改則爲過滋甚如內外大臣尙有未喻朕意再行奏請者朕必不
允准並當治以應得之罪此不特王大臣等爲朕股肱咸宜善體
朕意卽天下臣民亦當共見共聞者朕見因雪澤未霑省愆思過
宵旰靡甯或者恃此一念可冀天心協應鴻貺克臻俾閭閻
咸登樂利是則朕所期望而不敢必者也若天下臣民以乙卯停
止慶典無由伸其愛戴之忱意有未愜將來丙辰年歸政後遇朕
壽辰彼時嗣皇帝以天下養率領臣民爲朕祝嘏介釐以洽輿情
而昭盛典原無不可朕此時則惟有倍加乾惕勤政愛民不敢以

時際隆平稍涉鋪張致蹈盈滿之戒將此通諭知之○壬戌上

御經筵○癸亥以慶善爲左副都御史

由大理寺卿遷

○壬申諭原任廣

西提督許世亨前出師安南奮勇捐軀且能深明大體忠盡可嘉

特加恩賞給伯爵令伊子許文謨承襲在頭等侍衛上行走見在

已滿三年該員籍隸四川著交部以鄰近之湖廣省參將卽用以

示眷念盡臣恩施無已至意○辛巳豁免內外各官攤賠代賠銀

兩及兵丁應代祖父坐扣餉銀五十五萬九千兩有奇○甲申諭

昨據福康安等將查審吉林辦理濫務虧缺庫項勒派民戶一案

分別定擬一摺此案前經副都統秀林查訊參奏該管協領諾穆

三托蒙阿早知此事敗露必干查究先將檔冊私行改換並向同

案人證及鋪戶等串通供詞希圖掩飾迨至福康安到彼傳提訊

問伊等豫經商定遂至扶同供認眾口如一誰肯首先吐露福康

安等摺內聲稱徧加質對所供俱屬相符之處原不足信諾穆三托蒙阿經管濫務有年濫局一切事宜係其專辦乃並不妥協經理以致創夫借欠日重庫項虧缺滋多又復恣憑攤派累及無干民戶實爲此案罪魁茲福康安等將諾穆三問擬斬候托蒙阿問擬發遣新疆業屬將就完事此事因係濫務近於言利是以朕不加深究卽照擬完結該協領等已爲僥倖乃福康安等另片奏稱諾穆三等本身雖查抄入官尙有兄弟親族擬請將該二犯照例監禁責令將見籌接濟創夫銀三萬兩勒限措交准其減等發落等語實不免意存開脫且近言利矣卽如福康安等查出諾穆三家貲內各有數千兩私銀存店據該犯等供稱俱係未虧官項以前先行入本及閩福康安等另摺又稱諾穆三家住甯古塔置有產業典當賣產而來移住吉林等語試思諾穆三原住甯古塔久

已安居樂業者非因吉林辦理濫務可得贏餘需潤人情安土重遷又豈肯變棄產業遠去其鄉至吉林居住卽如兩淮商人在揚州貿易積有厚貲又豈肯無故將其鹽產槩行變賣遷住長蘆之理卽此一端而論可見承辦濫務之員顯有從中需潤之事其存店私銀必非盡屬伊等貲本乃福康安等於此一節並未一語究詰伊等更事有年不應如此疏漏卽以此詢之福康安亦無詞可對至恆秀身爲將軍到任後明知濫局虧短緣由並未據實參奏復私派無干民戶其罪實無可諉試思各省地方官如有虧短庫項私行攤派累及百姓者應得何罪福康安等豈不知之乃僅將恆秀於托蒙阿流罪上減一等問擬杖徒又以伊係宗室押帶赴京交宗人府照例辦理顯係福康安與恆秀誼屬姑表弟兄有心徇庇從寬定擬希圖含混了事至胡季堂因其係漢大臣無可瞻

徇是以派令前往會同審辦卽云吉林官員多習清語伊未能通曉邊務亦非所悉但如諾穆三祖居甯古塔若非貪圖邊局雷淵因何變產移居吉林此等情節顯然朕一經披閱卽行看出胡季堂久辦刑名豈竟見不及此乃亦置之不問是此事胡季堂松筠不過隨同附和聯銜入奏又安用派令伊等前往會辦爲耶福康安受朕厚恩特加簡派自應秉公持正方爲無負任使乃瞻顧親誼曲庇局員本應治以應得之罪因念其辦理廓爾喀一事不辭艱險著有勞績是以姑從寬宥但伊審辦此案種種瞻徇豈能於朕前調停混過若朕必欲徹底根究無難再派和坤前往覆審設和坤又復瞻徇情面將就完案朕卽可提至京中親加研鞫一經得實又何難一併治以徇隱之罪朕特以此事究因邊務起見且不爲已甚是以不復深加究詰福康安胡季堂松筠著嚴行申飭

至此案昨經福康安等奏到經朕看出詳細指斥卽令軍機大臣繕寫飭諭而軍機大臣亦復意存瞻顧遷延觀望並未卽日擬旨進呈見距歸政之期尙有二年朕一日臨御卽一日倍加兢業豈容大臣等頗預從事阿桂和珅王杰福長安董誥俱著交部議處朕今年八十有四幸叨 昊眷精神強固辦理庶務鉅細靡不躬親於臣下功過權衡至富雖見值盼雨焦勞亦不肯因此倦勤稍有忽略且亦非因心不快辦理從嚴也內外大臣尤當仰體朕心倍思勤惕以期無負朕諄諄訓誡至意

三月己丑諭原任兵部尙書李世傑前經簡任封疆宣力有年辦理地方事務認真整飭今聞溘逝殊堪軫惜所有應得卹典著該部察例具奏尋予祭葬諡恭勤○癸巳裁哈密印務處辦事防禦蒙古領催增設主事一○庚子 上啓鑾巡幸天津○免經過地

方及天津府屬額賦十分之三○免天津府屬通賦並免大興等十三州縣通賦十分之四○丁未免石口村本年額賦○己酉諭朕此次臨莅津淀原爲當令時巡省方問俗並非爲遊玩適情屢經降旨諭令該督等毋許於沿途備辦排富點綴等件以致無益妄費乃本日駐紮揚芬港地方該督尙備有龍舟及戲劇雜伎踵事增華徒滋糜費殊非仰體朕問民疾苦黜華崇實之意本應將該督等治以應得之罪但念伊等職司地方因朕翠華臨幸藉以抒忱效悃亦屬出於愛戴之心姑從寬免其究處已將龍舟等件槩行屏除外至此項費用雖據該督等奏係捐廉辦理第恐地方官吏有藉詞累及閭閻情事著於長蘆應解內務府款項內賞給銀三萬以爲揚芬港豫備龍舟及各項點綴之用該督等宜益知感愧毋任屬員等絲毫派累以副朕屏絕浮華省方施惠至意○

辛亥免楊柳青夾河地方本年額賦○壬子 上駐蹕天津府○
甲寅賞天津召試舉人姚文田內閣中書○乙卯 上自天津回
鑾

夏四月癸亥 上還京師○甲子諭刑部題覆雲南省李氏截傷
李文有身死一本閱其情節李文有與大功堂弟李文玉彼此口
角將鋤頭砍傷李文玉左太陽等處昏暈倒地李文玉之妻李氏
看見伊夫暈死一時悲忿順用剪刀截傷李文有胸膛等處傷重
殞命是李氏之截斃李文有實由於救夫情切而向來辦理此等
案件仍依律擬以斬候揆諸情理殊未允協夫明刑所以弼教而
教莫大於綱常妻之於夫何異子之於父母身爲人妻目擊其夫
被毆危急而安坐不救所謂綱常者安在乃律例所載止有救父
母情切聲明請旨減等之條而救夫情切者未經著有成例未免

疏漏李氏者卽照救父母情切之例酌予減等並著刑部將此等案件一併分別議減載入例冊以示朕詳慎庶獄扶持名教至意尋奏嗣後如有夫被毆危急其妻情切救護毆死人者疏內分別減等援例請旨其或夫與人口角至令其妻毆人致斃或夫先與人尋釁其妻踵至共毆斃命仍照各本律科罪不得援例槩予減等從之○癸酉諭據福甯奏保舉堪勝知府之武定府同知嵇承羣曹州府同知陳文駿二員並聲明嵇承羣係大學士嵇璜之子等語外省保舉自應簡拔寒畯况前降諭旨令督撫等各保舉一二員送部引見如該撫因一時乏人卽保舉一員有何不可且該省同知直隸州知州不下十餘員其中豈無一二才具堪膺方面之選者而必須將嵇璜之子嵇承羣登諸薦剡殊屬非是大學士之子皆朕所素知如果才堪任使原可量加擢用卽如阿桂之子

阿迪斯見任侍郎和珅之弟和琳前因辦理廓爾喀糧餉軍務認真出力洊擢尚書然此皆朕特加簡擢並非因人保薦始行用至卿貳也朕臨御五十九年因材器使一秉至公大學士子弟從不准臣工等互相保薦致啓黨援之漸今福甯輒將嵇承羣保奏雖於摺尾聲明究不免瞻徇情面福甯著交部議處嵇承羣不准送部引見○丁丑 上詣 黑龍潭祈雨

五月戊子允許祖京回籍終養以陳大文爲廣東布政使○庚寅諭吉慶奏浙省鄉民飼蠶每年在 軒轅黃帝廟祈祀 蠶神向不官爲致祭隨安設神牌於後殿率屬致祭三月下旬天氣晴和蠶桑茂育等語蠶桑本與稼穡並重浙省杭嘉湖三府尤比戶飼蠶以資生業允宜恭祀 先蠶聿崇昭報著每年官爲致祭載入該省祀典並御書扁額發往懸挂 軒轅黃帝廟及 先蠶後殿

以祈 神貺○甲午諭福甯奏歷任曹縣知縣獲盜十年不辦監
斃要犯三名嚴審究擬一摺此案曹縣事主岳秉禮被盜用火燒
傷劫去衣物當經已故知縣譚尙道拏獲正盜六犯起獲真贓乃
並不卽行審辦又未將獲犯在監病斃三名之處據實通報歷任
知縣復因循不辦以致盜犯淹禁十年似此闕茸廢弛實出情理
之外所謂整飭吏治者安在該管知縣及上司等均非尋常疏玩
可比所參歷任曹縣知縣白豐劉大紳謝蓮錫吳華華裕端俱著
革職發往軍臺效力贖罪歷任曹州府知府恩保蔣繼煥歸朝煦
吳人驥杜安詩俱著革職本管道員唐侍陞按察使羅煥前護巡
撫布政使江蘭俱著交部嚴加議處所有應議歷任司道及各巡
撫俱著查取職名各部分別嚴加議處福甯於此案雖未能及早
查出但究係該撫審明具奏著交部議處所有盜犯劉廣居等卽

著軍機大臣會同該部速議具奏○丙申京師雨○戊戌以田鳳

儀爲浙江布政使謝啓昆爲浙江按察使

由江南河庫道遷

○庚子吏部

議奏山東曹縣獲盜十年不辦監斃要犯一案請將不行查參之

巡撫福甯降一級調用有級抵銷免其降調前護巡撫布政使江

蘭降二級調用按察使羅煥降三級調用均毋庸查級議抵得旨

福甯著銷去加一級免其降調江蘭著降補山東按察使仍帶降

一級留任羅煥著降補山東運河道仍帶降二級留任此案各該

上司於所屬獲盜任意因循致掩禁十年之久要犯監斃多名實

爲近來未有之事非尋常失察可比江蘭羅煥本應悉照部議革

任降調但念係統轄之員姑加恩從寬僅予降補○辛丑以孫日

秉爲山東布政使張長庚爲湖北按察使

由漢黃德道遷

○甲辰郭世勳

以病免調朱珪爲廣東巡撫陳用敷爲安徽巡撫以姚棻署廣西

巡撫

原任江西巡撫

○丙午以直隸保定等八十三州縣旱命賞給一月

口糧

○戊申諭乾隆四十五年朕年已七旬恐於秩祀大典儀節

有愆始於

南郊大祀時令諸皇子分詣

配位前奠帛至北

郊儀注內升香奠帛禮臣尙復沿照親行舊例具奏夫

圓丘

方澤皆稱

大祀而

南郊配

天典禮尤重乃未經一律更定

自係彼時禮臣辦理遺漏此次大祀

方澤

皇地祇位前香帛

朕親自供獻

列祖

列宗配位前宜如

南郊禮朕親自升香

其奠帛禮儀亦遣諸皇子分獻此非朕怠於將事緣

郊祀大典

務在精誠孚格禮節無愆方足以昭肅靈况朕春秋已八旬開四

距乾隆四十五年又閱十有四載雖仰邀

昊眷精神強固如常

然於登拜趨踰究未免稍遜於昔若

列祖

列宗配位前奠帛

一節仍勉強將事不特

南北郊儀又軒輊未協崇效卑法之義

東華續錄

乾隆一百十九

八

且慮節文繁重跪起維艱或致遣官恭代轉於 郊祀大典未獲躬親尤非盡誠昭事之道朕自臨御以來夙夜孜孜惟以敬 天報本爲念 郊壇大祀靡不劼歆承茲因年壽已高不得不酌減儀文以冀升馨告備是非敢自惜其勞正所以要之於久我世子孫承禧衍慶如能似朕之年躋上壽實我國家無疆之庥所有 郊祀經曲繁文自不妨照所減禮儀奉爲法守若未逾耆耄則於 園丘 方澤 宗社大祀仍應恪遵定制肅奉明禋儻或稍憚勤勞耄年未屆遽思節減卽非勵精昭格之義我子孫其敬承無替倍矢虔恭以迓億萬年無疆福祚方無負朕諄切訓誡至意此旨著於上書房軍機處禮部太常寺各恭錄一通敬謹遵照

○辛亥 上啓鑒秋猶木蘭○免經過地方額賦有差○乙卯諭理藩院設有額外侍郎一缺原以加恩蒙古人等見在御前額駙

土默特貝勒索諾木巴勒珠爾年逾六旬辦事奮勉著授爲額外侍郎以示鼓勵

六月丙辰朔以山東歷城等五十一州縣旱賞給一月口糧○丁

巳

上詣熱河

文廟行禮

上駐蹕避暑山莊○戊午戶部侍

郎巴爾阿以監修熱河寺廟工程不實革職○辛酉諭原任廣東

巡撫郭世勳自簡任封疆頗資宣力前因患病准其開缺俾得安

心調理茲聞溘逝深爲軫惜所有應得卹典該部察例具奏尋子

祭葬○庚午諭本日國史館呈進王師列傳朕詳加披閱王師在

巡撫任內辦理地方事務甚爲實心任事伊子王亶望前在甘肅

藩司任內於捏災冒賑一案貪婪飭法侵帑殃民實爲罪不容誅

且以伊一人連及眾人俱致身罹重辟釀成巨案不得不從重懲

治是以將王亶望立寘典刑並將伊子槩行發往新疆充當苦差

東華實業 卷一百一十一

此爲懲儆貪黷起見進情治罪原所應得第念伊父王師簡任巡撫尙爲國家良臣若因伊子王亶望貪黷營私以致絕嗣於朕心實有所不忍又如雅爾哈善前在西路軍營失誤軍機放走小和卓木雖係誤聽順德訥之言但伊身係將軍彼時以軍務重大法所難宥是以將伊正法並將伊妻子發往黑龍江以昭炯戒今念其事已閱數十年雅爾哈善身伏國典其妻子亦尙在可原並此外如勒爾謹陳輝祖楊景素王廷贊柴大紀等俱因身獲重罪將伊子嗣發遣新疆等處者亦應一體查辦著留京辦事王大臣會同刑部將指出以上各案及此外尙有類此發遣官犯及獲重罪之子孫一併查明案由詳晰開單具奏候朕加恩辦理王亶望雅爾哈善諸人皆係朕簡擢任用因其自罹重辟累及妻孥固屬罪由自取今朕於歸政以前特沛殊恩施仁法外俾其子嗣仍得釋

同鄉里延其宗祀伊等伏辜泉壤亦當共知銜結也○諭和琳奏設立唐古特各邊界鄂博及查閱前後藏漢番官兵各摺唐古特地方毗連外番向因界址不甚分明易致爭擾此次經和琳帶同遊擊張志林等由沿邊一帶親自履勘悉心講求一律堆設鄂博所有唐古特西南外番布魯克巴哲孟雄作木朗洛敏湯斯爾喀各交界均已盡然清楚邊界可期永遠甯謐至前後藏漢番官兵向來最爲懦弱今經和琳等嚴飭訓練親加查閱分別獎懲使新設番兵皆成勁旅實爲衛藏所未有和琳辦理一切均爲妥協著賞給御用大荷包一對小荷包四箇以示優眷○諭軍機大臣等和琳等奏辦理阿足地方差員被夾壩搶擄一案酌定章程令各該處呼圖克圖等於所屬緊要地方派撥番民輪流巡防嗣後再有夾壩出沒卽將該呼圖克圖等交達賴喇嘛分別嚴懲等語所

辦俱屬妥協惟摺內所稱倉儲巴字樣已用硃筆點出藏內所管倉庫事務之人向俱稱爲商卓特巴今衛藏事務俱係駐藏大臣督率管理遇有陳奏之摺自應以商卓特巴字樣登敘不應相沿舊時承襲之語仍稱爲倉儲巴卽如噶布倫之稱爲噶倫等類亦皆應一律按照唐古特音譯正和琳等卽未能諳悉何妨傳詢講求一一通曉也○癸酉諭阿桂等奏請申明例禁嚴禁小錢一摺已交步軍統領衙門五城順天府一體查禁矣據稱小錢之弊節經飭禁乃見在派人持銀至市易錢親加檢閱每串內攬用砂板驚眼等錢數十文京城如此外省不問可知顯係該督撫奉行不力等語各省地方小錢充斥節經降旨通飭查禁而其弊仍復如故此其致弊之由朕細思得之卽如富商大賈資本殷實卽使偪令私鑄小錢伊等顧惜身家亦斷不肯作此違禁之事不過游惰

小民衣食不給者於僻靜處所私行設鑪鎔化能有幾何其餘止係肩挑步販爲數更少何至小錢日積日多甚至流行他省其故蓋由於各省錢局鼓鑄錢文之時不肖局員將官錢私行鑄小額外私鑄小錢希圖盈餘肥橐該管上司從不顧問或且不免從中分潤是以利於多鑄從不議及停減小錢充斥其弊實由於此而各省中則以雲南貴州四川湖廣爲尤甚蓋各省鼓鑄所需銅鉛俱係由滇黔二省採買運往而所買銅鉛皆由部中查照各該省應行額鑄錢文覈定數目比較盈絀不能額外多鑄即使各該省局員希圖微利將局錢減小餘出銅斤額外多鑄亦尙限於額銅不能過溢至雲貴四川本係出產銅鉛之地取攜甚便而湖廣漢口地方爲雲貴四川總匯奸民雜處私販私鑄諸弊叢生是以小錢公然行用比之各省倍爲充斥且戶工二局鼓鑄錢文例有待

郎二人專行管理又有該部各堂官隨時督察錢局監督更係二年更換所鑄錢文尙不能弊絕風清然即使有弊亦不過稍減分兩較之官鑄形模略小斷無砂板驚眼等項破爛小錢若非出於此四省私鑄流行攪和則此等小錢又從何而來况各該省止係司道府等官承辦又係常川管理安能不弊端百出耶見惟湖北省經畢沅等奏請停止鼓鑄尙爲留心整飭然僅請停止一二年尙覺年分較少看來竟應多停數年方爲有裨至雲南局存錢文一百餘萬串省局及東川二處仍復按卯鼓鑄其每年兵餉又不搭放錢文何必陳陳相因徒滋積壓乾隆四十五年和珅前往該省審案時因小錢風行曾經具摺參奏惜彼時未經即時嚴辦停止鼓鑄以致積弊相仍蔓延他省茲又閱十數年該省錢法之弊自更不可問所有雲貴二省錢局鼓鑄竟當永遠停止四川省經

孫士毅在彼督率查禁小錢漸就減少然近邊甯遠一帶尙仍沿用小錢根株未能淨絕是該省鼓鑄亦應永遠停止福康安前在雲貴四川總督任內未能實力整頓杜絕弊端已難辭咎姑念伊到任未久旋即調任是以不復深究今復任四川總督務須趁此甫經整頓之後實力督率不避嫌怨留心查辦以期小錢淨盡方爲不負任使若仍前辦理因循以致錢法日壞小錢仍舊充斥則惟福康安是問其餘各省督撫經朕屢加訓飭務宜共矢天良據實查辦若仍漫不經心致流弊竟無底止必將該督撫從重治罪決不稍爲寬貸但查禁小錢全在該督撫等實心董率嚴密稽查不得委之官吏胥役轉致藉端擾累近聞外省繁劇州縣所用衙役有多至千餘名者內中並非正身俱係無藉之徒挂名冒充希圖恐嚇鄉愚藉資勒索於吏治民生殊有關繫並著該督撫等實

力稽查一體嚴禁除額設各役外其餘濫行冒充役者槩行革逐儻並不認真辦理以致滋生事端一經發覺除該州縣從重治罪外必將該上司一體治罪恐不能當其咎也將此通諭知之○

辛巳調景安爲戶部右侍郎

由倉場侍郎調

○癸未諭軍機大臣等本日

福長安奏近日雨水情形據稱京城自十七八至二十五六等日連日俱有大雨勢甚傾注道路俱經水漫京城附近地方所種莊稼其已經長發出土甚高者俱無妨礙而山坡道旁補種田禾甫經出土者間被水淹沙壓等語京城自月初以來通得透雨大田均已布種齊全今因十七八至二十五六等日連日大雨傾注以致山坡道旁補種田禾間被積水淹浸沙土衝壓此等處所農民已芻蕘本乘時趕種甫經出土長發即被水淹沙壓難望有收豈不可惜可憐此時水勢自已消涸但農諺有初伏蘿蔔二伏菜三

伏種蕎麥之語是蔬菜蕎麥等項目下猶可趕種者留京王大臣傳詢順天府此等水淹沙壓地畝如有無力貧民不能再行補種者卽行查明酌給籽種俾得趕種有收藉資口食不至失所方爲妥善將此諭令知之仍卽速奏

秋七月丁亥以湖南零陵等二縣水災倍給葺屋銀兩○戊子永定河溢○庚寅諭許文謨著赴湖北興國營參將任念伊父許世亨旣能捐軀又識大體著仍賞戴花翎以示眷念勤勞至意○命刑部清理庶獄減徒以下罪承德府如之○乙未諭朕披閱通鑑輯覽內唐開元五年九月令史官隨宰相入侍羣臣對仗奏事條下引貞觀舊制諸司皆正邪奏事又注稱唐太明宮含元殿爲正邪亦謂之南邪等語心疑筆誤因查諸舊史乃知俱將牙字誤作邪字更檢閱字書牙與衙字本屬通用至邪字從無與牙字相通

之義甚爲舛錯所有原辦通鑑輯覽之總裁纂修校對等官見經軍機大臣查明原書首卷開列銜名內見存各員如阿桂孫士毅紀昀彭元瑞畢沅吳省欽等本應交部議處姑念成書已久事隔多年阿桂等及其餘纂修校對各官俱著一體加恩免其交部至武英殿刊本及四庫全書繕本俱著查明改正外所有頒行各直省刻本並盛京江浙省文溯文宗文匯文瀾四閣存貯繕本亦著各該督撫府尹等一律改正○甲辰諭前因全德參奏巴爾阿在兩淮鹽政使任內有與商人往來交結各款而書麟於奉旨查詢時並未查明參奏是以將該督交部嚴加議處並令將因何徇隱不奏之處據實具奏茲據奏稱巴爾阿在鹽政任內所行無恥之事因平素不與商人接見毫無聞見實爲孤負委任等語實不成話書麟於奉旨查詢時既未經據實陳奏今復經飭詢尙以素不

接見商人爲詞意存迴護書麟係兩江總督例當兼管鹽務豈不當留心稽查非若巡撫之專管地方事務不兼管鹽政猶可諉爲不知者比乃旣經徇隱於前仍復飾詞迴護於後竟同驍贖又自請罰銀贖罪更不成話且伊在總督任內有年於地方事務何曾有一件整飭實爲孤恩溺職書麟著革職摘去翎頂卽行來京候部定罪所有兩江總督員缺著富綱調補雲南小錢充斥局錢存積甚多見在停止鼓鑄查辦小錢等事甚爲緊要正資幹材調劑富綱人尙謹飭而才具未能開展此等事件非伊所能辦理兩江地方雖屬遼闊究非邊要繁劇可比且距京不遠或可隨時指示是以將伊調補富綱惟當倍加奮勉實心經理以副委任福康安曾任雲貴總督於該省情素爲熟諳且平日辦事認真於調劑銅務錢法鎮撫邊陲皆所優爲著卽調補雲貴總督福康安接奉

此旨後將督篆交孫士毅暫行署理卽馳赴雲貴新任福康安到雲南後富綱卽行交代速赴兩江總督之任第滇省路遠富綱到任尙需時日所有兩江總督印務著蘇凌阿由京馳驛速往清江浦摘取印信暫行署理並於接奉此旨後卽行起程不必前來行在請訓蘇凌阿於兩江總督本可勝任念其年屆八十精神究恐不能周到是以令其暫署俟富綱抵任再行回京供職見在留京事務相距同鑒之期不遠不必添派刑部見有阿桂管理所有滿尙書缺亦不必另行簡署其刑部印鑰卽著交阿桂帶管戶部及三庫印鑰著交金簡帶管和琳奉差以來辦理一切衛藏邊疆軍需各事宜定立章程撫輯各部落訓練番兵均能實心整飭經理妥協且於四川口內外地方各情形皆爲諳悉軍需款項亦係熟手所有四川總督員缺卽著和琳補授松筠此次奉差湖北經過

衛輝府時適遇地方被水卽能體朕如傷在抱之意留駐該處督率撫恤並不置身事外深堪嘉獎足資倚任見在衛藏甫經和琳整頓之後正須妥員接代慎守成章以期更臻甯謐雖有和甯在彼伊係甫用之人恐未能經理裕如松筠卽升授工部尙書前往駐藏辦事其荊州審辦關稅一案本非緊要無難卽日完結著松筠於審案事畢拜發奏摺後卽由荊州就近馳驛前往西藏辦理駐藏事務實心任事用副委任○以直隸水災命截漕十四萬石撥部庫銀四十萬兩備賑○丙午諭大學士嵇璜老成端謹歷練有年簡任綸扉齒逾八袞方冀長承恩眷用資倚任前因患病告假卽令皇八子帶領御醫親往診視茲遽聞溘逝深爲軫惜著賞給經被以昭飾終令典加恩晉贈太子太師派皇八子帶領侍衛十員前往奠醴並賞銀一千兩辦理喪事其從前降革處分悉予

開復所有應得卹典該部察例具奏至伊家屬扶柩南歸並著加恩照例遣官一員護送回籍以示優眷尋予祭葬諡文恭○召孫士毅入閣辦事

八月丁巳諭鹽政有清釐嵯務管束商人之責理宜清操自矢潔己奉公方足以資整飭前據董椿奏兩淮鹽政衙門每日商人供應飯食銀五十兩又幕友束修筆墨紙張一切雜費銀七十兩每日供銀一百二十兩是該鹽政一切用度皆取給於商人以一年計算竟有四萬三千餘兩之多試思御尚膳房度支經費康熙年間需費較多然比之前明光祿寺所用減損已不啻倍蓰至朕臨御之初兼有 慈甯爾壽二宮分例已比康熙年間大減今則慈甯爾壽二宮分例並無其事見在宮闈止有二妃二嬪以及諸皇子皇孫等並軍機大臣上書房南書房以及侍衛章京拜唐阿

等各分例每年膳房所用通計僅止三萬餘兩以朕玉食萬方其進奉之數不過如是此非故爲節儉而膳饌所需實已無可復加朕子愛黎元施恩加惠初不惜億萬帑金豈獨於尙膳經費有意從減而每年所用僅止此數卽如戶部尙書得項較優每年亦止五千餘兩外省總督至多者不過二萬金鹽政官秩微末司員乃每年供應竟至四萬三千餘兩之多是不但騷奢過分亦且折福以致不能承受恩眷遇事往往昏憤錯謬得罪實由於此况鹽政每年例進物件又係商人承辦並非自出己貲更何得復令商人似此逐日供應致啓交結婪索之弊總由該鹽政應得養廉尙有因公坐扣之項輒藉此爲詞諸弊叢生殊非政體但此弊已久今亦不加追問嗣後兩淮鹽政所有商人一切日費供應俱著一律裁革其每年應得養廉著實支銀五千兩以資食用而杜弊端

仍著總督隨時留心嚴密查察該鹽政既實給養廉已爲優厚辦公儘屬有餘儻復陽奉陰違仍令商人相沿供應並此外有藉端需索情弊一經查參必當視巴甯阿等加倍治罪決不姑貸○諭董椿於巴甯阿前在兩淮鹽政任內與商人交結婪索各款曾經降旨詢問並不查明參奏是以革職等因本應從重治罪第念商人供應鹽政一節係兩淮積年宿弊若非董椿據實陳明則此弊無由釐革因此一事尙可從寬董椿著免其交部治罪加恩賞給拜唐阿在熱河效力贖罪○戊午永定河漫工合龍○丙寅諭軍機大臣等據成德來京奏稱和琳辦事甚妥且見達賴喇嘛不行叩拜達賴喇嘛惟命是聽等語和琳如此舉動甚爲得體數年以來藏內風氣日下諸事廢弛今經和琳整頓權歸而令自易行見派松筠赴藏辦事伊係蒙古素遵黃教儻不知自重恐將來辦事

仍虞掣肘著傳諭松筠抵藏後接見達賴喇嘛等不可叩拜即使
遵奉黃教俟年滿回京之日再行禮拜亦無不可○戊辰諭軍機
大臣等近來蘇揚等處呈進物件多有雕空器皿如玉盤玉碗玉
鑪等件殊屬無謂試思盤碗俱係盛貯水物之器鑪鼎亦須貯灰
方可然熱今皆行鏤空又有何用此皆係該處奸猾匠人造作此
等無用之物以爲新巧希圖厚價獲利而無識之徒往往爲其所
愚輒用重貲購買或用價租賃呈進朕於此等物件從不賞收卽
使擲回而奸商已得厚利伊等總未喻此意甚至回疆亦效尤相
習成風致使完整玉料俱成廢棄至搬指所以鉤弦闔體若搬指
套近亦俱用玉成作甚屬無謂搬指套原以便於佩帶今以玉爲
之更覺累重無當殊爲可惜著傳諭揚州蘇州鹽政織造等此後
務須嚴行飭禁不准此等奸匠仍行刻鏤成作並出示曉諭令其

一體知悉以杜奇袤而歸純樸所有回疆呈進雕空碗蓋一箇並著發交閱看○己巳諭朕臨御天下五十九年仰蒙 昊蒼眷佑

列聖貽庥薄海昇平梯航向化重熙累洽惟日孜孜無時不以敬 天勤民爲念行慶施惠錫祐延禧普免漕糧二次地丁錢糧四次而偶遇水旱偏裨隨時蠲租賜復賑貸兼施不下帑金數千萬兩所以涵養生息子愛黎元至周且渥茲紹膺統緒明歲正屆六十年粵稽史冊前代帝王享國長久者未可多得卽有一二或係冲齡踐阼用能多厯年所朕則春秋二十有五始卽位誕膺大寶迄今八旬開四康強逢吉五代同堂景運增隆寰瀛甯謐享國之年幸周甲子壽祚延洪實爲古今罕觀之盛事此皆上蒙 昊駘蕃克膺備福朕於感荷之餘彌深兢業早經欽天監推算六十年元旦日食上元月食古來史傳所載有日食修德月食修刑

之說固因 上天垂象理宜修省其實君人之道於德刑二事本日本宜刻深兢勵亦何待日月薄蝕始懷寅戒之心應天以實不以文與其託諸空言寧若見諸行事之實修德莫大於愛民若覃敷恩澤加惠閭閻俾海寓子民共臻樂利則所謂修德孰大於是所有六十年各省應徵漕糧著再加恩暫免一次其應如何分年輪免之處仍著該部覈議具奏至以修刑而論則停免勾到卽所以恤刑但赦非善政利於宵小而不利於善良昔人卽有此論明年係六十年國慶後歲丙辰爲嗣皇帝卽位元年俱應錫慶施仁矜恤刑獄若今年停勾則三年連緩莠民恃有寬政作奸犯科者無所敬畏轉非辟以止辟之意是以本年仍照舊勾到明年元旦著照五十一年之例不御殿不受朝賀是日午後向有諸王暨皇子皇孫等內庭家宴之例五十一年元旦日食復圓後曾經舉行

明歲究係六十年周甲年分所有內庭家宴亦著一併停止舉行
朕於是日亦不御禮服照每年例恭詣 奉先殿 堂子及 先
師各等處行禮時御龍袍貂褂將屆日食時卽換常服以示寅恭
而寓修省日月薄蝕躔度本屬有定數千百年後皆可推算而得
所謂千歲之日至可坐而致但元旦上元適值日月虧蝕究爲
昊穹示儆之象幸 天恩垂佑適在明歲爲朕卽位周甲告成之
年自應祇承無斁設在丙辰正月則爲嗣皇帝卽位之元於吉祥
盛事轉爲未嫌是卽日月薄蝕一事而 上天之篤佑朕躬以貽
我子孫萬年無疆之庥者至優至厚朕惟有益感 天恩倍深乾
惕又明年乙卯爲朕臨御六十年本欲於萬壽節前由熱河回京
受賀今春因中外臣工懇請舉行慶典適上冬雪澤未獲優霑春
閒又復缺雨業經降旨宣諭令將明年慶典停止舉行若仍照庚

戊年八月之例於萬壽前回京則王公外藩以及大小臣工等必
又再四懇請舉行慶典則似朕今春所降諭旨轉爲不誠是以明
年仍定於熱河駐蹕過萬壽後再行回鑾俟至丙辰正月歸政嗣
皇帝以符正月上日受終文祖之義彼時備儀授受盛典光昭嗣
皇帝率領臣民以天下養介禧祝嘏慶洽敷天尤爲千古罕觀盛
事實我大清億萬載無疆之福也將此通諭知之○辛未起書麟
爲古城領隊大臣○壬申諭戶部左侍郎員缺著永保補授其新
授戶部右侍郎景安一俟辦理全漕完竣卽應來京供職所有倉
場侍郎員缺著僧保住調補阿精阿卽補授刑部右侍郎所遺陝
西布政使員缺著倭什布補授○癸酉以德泰爲廣東按察使由福
建興泉○甲戌 上自避暑山莊回鑾○命再撥部庫銀二十五
永道遷萬兩通倉米二十萬石於直隸備賑○調福甯爲河南巡撫穆和

蘭爲山東巡撫○庚辰 上還京師○辛巳命以兩金川閒曠地

畝給降番等開墾耕種免其賦稅○壬午諭前福康安奏拏獲傳習邪教之大甯縣民人謝添繡等與湖北竹谿縣之王占魁陳金玉往來傳授靈文經川省委員前往湖北查拏於拏獲後竟有夥黨在途搶回毆斃差役之事畢沅於所屬地方有此等案件並未奏及業經降旨嚴行申飭並令該督親赴各該處嚴密查拏茲據畢沅等奏接到陝省咨會當卽飭屬馳赴襄陽地方拏獲樊學鳴一犯並將首犯宋之清拏獲及究出同教各犯劉喜等十八名接獲經卷等語該犯等在湖北地方傳習邪教已經數年該督並未及早訪聞查辦迨別省犯出接到札會始行飭屬拏獲案犯已屬遲緩又另片奏接到川省札會當又飭屬將傳教之王占魁韓龍二犯拏獲解川審辦等語而於奪犯傷斃差役之事既經接准福

康安咨會豈該縣並無稟報之事未提及一字可見該督既經失察於前又復迴護於後殊屬非是畢沅著嚴行申飭並著交部嚴加議處○甲申諭昨因畢沅奏接到川省札會拏獲傳教之王占魁韓隴等犯而於前被搶回之陳金玉一犯因何被搶並傷斃差役之處轉未奏及顯係迴護諱飾已降旨將伊交部嚴加議處矣本日又據該督奏先因此案人犯籍隸襄陽當委鄖陽府知府楊如桂前往襄陽會同該府張勳嚴密臚緝並派臬司張長庚馳往督飭妥辦先後共獲首夥五十二名又因竹谿縣地方與川省接壤據該縣稟報有奪犯毆差之事飛飭鄖陽府知府馳回本郡嚴密查拏請將疏防之竹谿縣知縣李秉中遊擊楊化祿革職協緝撫臣惠齡藩司汪新見往安陸查辦被水撫恤事宜省城重地未便同時遠出復飭臬司會同該鎮實力督拏等語所奏大奇不料

畢沅竟昏愎至此地方遇有聚眾傳教以致奪犯殺役已非小案畢沅身任總督平日漫無覺察已難辭咎及至川陝二省破獲各緝該督一接咨會理應星速親赴要處董率嚴拏將案犯立時捕獲以期稍贖罪愆乃畢沅視若無事先止派委知府楊如桂前往會拏及竹谿縣有奪犯毆差之事該督尙以省城重地爲詞安坐衙齋復令該府楊如桂馳回本郡往返耽延更不成話且覲顏委過於知縣李秉中遊擊楊化祿思以參奏屬員了事種種錯謬殊出情理之外畢沅本應革職治罪姑念其久任封圻從前辦事尙屬勤奮著加恩降補山東巡撫以觀後效但伊辦理地方事務如此玩誤若復任其坐擁厚廉不特無以示儆卽令其捫心自問何以自安畢沅著摘去花翎罰交湖廣總督養廉五年卽行完繳以爲浙江海塘工程之用再罰山東巡撫養廉三年分作六年扣繳

俾伊每年仍得支領一半以資辦公於懲創之中予以自新之路此係朕格外恩宥畢沅務宜倍加愧奮亟思懃悔毋再因循致干重咎所有湖廣總督員缺著福甯補授卽由河南速赴新任途次亦可辦邪教之案程和蘭著仍留河南巡撫之任所有畢沅參奏之知縣李秉中游擊楊化祿卽著革職留於該處協緝○免直隸通州等三十三州縣通賦

九月乙酉諭布顏著調補山東按察使卽赴新任其雲南按察使員缺著江蘭調補俟畢沅到山東接印後江蘭卽行速赴新任不必來京請訓○辛丑諭石經館總裁等校勘石經見在將次完竣和珅等與彭元瑞均係總裁和珅等所管事務較繁止能綜其大綱酌加參閱至於校訂釐正皆係彭元瑞專司其事彭元瑞著加太子少保銜並賞大段二匹以示獎勵若校定之文或有紕繆不

經之處將來披覽所及經朕指出惟彭元瑞是問○甲辰諭惠齡
兩任湖北巡撫於該省邪教重案未能覺發咎實難辭且伊母年
逾七旬惠齡著來京供職俾得就近侍養姚桑著調補湖北巡撫
其廣西巡撫員缺著成林補授

冬十月丙辰以成德爲左副都御史

由通政使達

○戊午諭

雍和宮

爲 皇考世宗憲皇帝肇封潛邸

皇考踐阼後命曰

雍和宮

迨朕紹承大統以

神爽憑依之地理宜祇肅潔錫爰卽舊時宮

殿供佛莊嚴每歲朕親詣拈香瞻禮藉抒永慕之忱用昭崇奉之

義因憶乾隆初年鄂爾泰曾提奏其意請將

雍和宮賞給和親

王居住朕未之允也和親王乃朕之弟俾居此處雖無不可但究

係 皇考肇迹之區若令列邸分藩者居此

發祥之地不特鄰

於褻越並恐無福祇承况和親王分府之後曾遭回祿使當日遂

允鄂爾泰所請則此 潛邸舊地或值不戒於火更成何事體卽
或斯地曾爲 皇考臨御百神呵護不至有意外之災但自和親
王而後襲爵業經四次本應遞減今當襲貝子朕格外加恩兩次
襲封親王郡王今綿脩仍恩襲郡王而所居王府已不能修葺整
齊至飾樓題漸就剝落設以 雍和宮爲和親王藩府豈能如今
日之紺宇梵宮輪奐長新爲萬世所瞻仰乎然茲 雍和宮內朕
未經敬安 神御者蓋因 皇考升祔 太廟烝嘗禘祫脍炙昭
虔揆諸古制原無別安 神御之禮况宮中有 奉先殿景山有
壽皇殿圓明園有 安佑宮歲時瞻拜已足申愾聞優見之思
故 雍和宮供奉三寶不復敬安 神御參稽禮意實爲至當更
思靈壽宮乃朕稱太上皇後頤養之所地在禁垣之左日後必不
應照 雍和宮之改爲佛宇其後之淨室佛樓今既有之亦不必

廢也其宮殿永當依今之制不可更改若我大清億萬斯年我子孫仰膺 昊眷亦能如朕之享國日久壽屆期頤則寧壽宮仍作太皇之居祥衍無疆更屬盡美盡善吉祥盛事本日朕因親詣

雍和宮拈香景仰 前徽思垂奕禩用是特頒訓諭著總錄兩通

一交上書房一交內閣存記俾我子孫知所憲章勿得輕爲改作用垂法守○庚申諭巴爾阿前在兩淮鹽政任內貪婪不職而與商人聯宗一事尤爲卑鄙是以定擬絞候第所犯款蹟止於卑鄙無恥其罪尙不至於死且念其平日辦理工務尙屬諳習著加恩釋放但伊情罪較重非如董椿之僅止徇庇者可比不便卽邀錄用反覺在董椿之上著賞給拜唐阿前往熱河同董椿在工程處自備資斧效力贖罪○壬戌諭軍機大臣等福甯奏審明王應琥宋之清二犯係邪教一案倡首惑眾之人其所稱牛八及彌勒轉

世提訊各犯已一百二十餘名無不逐加窮詰間有聽聞牛八之語者加以刑夾均無指實等語所辦好牛八掌教彌勒轉世之語見經福甯拔出邪經係起自前明正德四年且乾隆二十二年三十三年河南貴州所辦邪教已有牛祖牛八名目自係奸徒捏造擬拾無稽煽惑流傳冀圖聳聽但見據勒保奏訪獲劉松一犯於伊卧房內搜出銀二千兩據供有舊徒安徽太和縣原香集人劉之協及劉之協徒弟宋之清自五十四年起至五十八年曾到過隆德六次起出之銀就是劉之協令宋之清向衆人斂取打丹銀兩陸續送給劉松等語劉松一犯昨據穆和蘭奏訊據宋顯功等供俱稱爲老教主是該犯必係此案倡教之人宋之清所傳邪教尙得自劉之協劉之協又得自劉松乃宋之清在湖北經福甯再四嚴審並未將劉松劉之協據實供吐實爲狡猾可惡自應從重

究擬以示懲儆見經勒保訊出劉松舊徒劉之協又係安徽太和縣人恐安徽一省習其教者又復不少此事著交與蘇凌阿陳用敷督飭所屬務將劉之協密速查拏嚴加審鞫該犯如何爲劉松傳教斂錢並將訊出入教之人一併嚴拏做照陝西之例分別定擬具奏其劉之協一犯亦卽遵委委員解赴襄陽交福甯歸案辦理○癸亥諭軍機大臣等長麟等奏荷蘭國遣使齎表納貢懇求進京叩祝一摺此係好事披閱長麟等譯出原表該國王因明年係朕六十年普天同慶專差貢使齎表到京叩賀情詞極爲恭順長麟等因其表文係公班大臣呢哱哱等代伊國王出名與體制稍有不符復加盤詰何必如此深論自應准其來京瞻覲遂其向慕之忱著長麟等卽傳諭該使臣等知悉並派委委員護送起程止須於十二月二十日封印前一二日到京俾得與蒙古王公及

外藩諸國使臣一體同邀宴資並著知會沿途經過省分令各該督撫一體派員按例照料以便如期到京再荷蘭國所進文在京西洋人不能認識並著長麟等於居住內地之西洋人有認識荷蘭國字體兼通漢語者酌派一二人隨同來京以備通譯將此由六百里諭令知之○乙丑福建龍溪縣被水獄壞獄囚安靜守法命將死罪減等軍流以下咸釋之○戊辰諭軍機大臣等朕披閱廓爾喀紀略福康安自第哩朗古宗喀進兵收復濟隴攻克熱索橋並由協布噶進攻東覺山梁等木城礮卡全行克復該處路徑險峻林深箐密福康安率領巴圖魯侍衛官兵等於人迹不到之處攀援登陟連次克捷實爲艱苦備嘗披覽之餘殊深眷念此時福康安自己由重慶前赴雲南時屆孟冬天氣漸寒特將上服黑狐大氅褂賞給俾資途中禦寒以示優眷將此諭令知之○庚午

諭昨九月閒石經館司事大臣等奏士子所讀經書多係坊本卽
考證之家亦止憑前明監本然監本中魚豕之外謬字句之衍缺
不一而足我朝文治光昭 聖祖仁皇帝御纂四經 欽定三禮
武英殿官刻十三經勘讐精覈久已頒發黌序嘉惠藝林但各書
卷帙繁多草茅寒素艱於購覓未必盡人能讀近因刊刻石經出
內府所弄天祿琳琅宋版各經古今流傳舊本莫不蒼萃蒙命臣
等詳悉校對與武英殿官刻諸書參稽印證逐條摘出釐訂成編
書不過六冊而俗本相沿譌謬靡不開卷瞭然擬名考文提要請
頒行天下俾士子人人得窺中秘精華不復襲別風淮雨之陋但
恐爲期過促僻遠地方傳布尙有未周請於乙卯科鄉試爲始俟
三科後考試四書五經題文俱照頒發各條敬謹改正儻再有沿
用坊監本以致舛誤者將考官及士子分別議處停科朕已允行

茲該館書成呈覽抽閱數條不過字句書體閒有異同於聖賢經義初無出入在總裁等校刊石經自應折衷善本援據精詳而士子等自束髮受書以來父師授受循誦習傳若限以三科遽令通行遵改似屬強以所難且恐鄉閭村塾傳布難周未能家置一編熟習貫串或應試者因一二字句舛誤被斥或者官等偶不及檢遂干處分似此繁列科條轉非朕嘉惠士林稽古右文之意聖賢垂教之義原不在章句之末卽流傳古本儒先各守經師家法未必無習誤承譌士子等操觚構藝惟期闡發經旨亦不必以一二字之增損偏旁之同異爲去取也另著該總裁等詳釋此旨折衷妥議具奏○御製石刻蔣衡書十三經於辟雍序曰前歲集石鼓文而爲之序有曰凡舉大事者必有其會與其時而總賴昭明天貺以成其功信弗爽也石鼓不過周宣王之事列於文廟之門

以寓興文尙俟其時其會若夫十三經則古聖先賢出諸口以傳
道授教其重於石鼓文奚啻倍蓰哉則今之石刻十三經是矣蓋
此經爲蔣衡手書獻於乾隆庚申者其閒不無少舛譌爰命內翰
詳覈以束之懋勤殿之高閣至於今五十有餘年亦既忘之矣昨
歲命續集石渠寶笈之書司事者以此經請乃憬然而悟曰有是
哉是豈可與尋常墨蹟相提並論以爲幾暇遺玩之具哉是宜刊
之石版列於辟雍以爲千秋萬世崇文重道之規夫經者常也道
也常故不變道則恆存天不變道亦不變仲舒之言實已涉其藩
矣蓋石經之昉自熒劉一字曹魏三字訖不可攷李唐北宋宋雖
曾有刻或乖或不全茲則出一人之手經諸臣之目視歷代爲加
詳矣予自六齡入學堂讀易書詩三經所爲易簡而天下之理得
二典三謨爲王道始正變風雅不知無以言及長而涉獵三禮覺

與三經爲有閒枕蓆經慎正統偏安之必公孜孜屢飫耄耄弗
衰雖自愧學之未成適今刻諸石列諸辟雍應時舉事以繼往聖
開來世爲承學士之標準豈非厚幸也歟蔣衡一生苦學之勤亦
因是酬矣若夫歷代注疏入主出奴紛如聚訟旣冗且繁衡止書
諸經正文餘槩從刪是也或以爲不觀注疏何以解經予則以爲
以注疏解經不若以經解經之爲愈也學者潛心會理因文見道
以六經參互之必有以探其源而晰其奧者是在勤與明而已且
予重刻木版之十三經注疏頒布世間者不少也舉辟雍以五十
年勒石經又越六載凡所以待其時而達其會八十老人復得成
斯大功者何莫非賴 昊天之鴻貺乎昔著知過論以爲其不可
已者仍酌行之斯之謂矣蓋凡物有其成必有其壞所爲石鼓石
經者皆是也然向不云乎經者常也道也天不變道亦不變依聖

人之門牆示萬世之楷則孰謂滄桑幻化能移我夫子不朽之道也哉是爲序○丙子諭前因 雍和宮爲 皇考世宗憲皇帝潛邸乾隆初年鄂爾泰會請賞給和親王居住殊屬非是朕未之允業經降旨交上書房內閣存記本日恭閱 世宗憲皇帝實錄雍正二年禮部奏請將 皇考潛邸升爲宮殿交工部會同內務府敬謹營造翰林院撰擬嘉名富蒙 降旨允從敬維 皇考之意亦以潛邸舊地應升爲宮殿俾爲萬世景仰以肅觀瞻朕前降之旨適與 聖意相合夫以 發祥肇迹之區自應深錫祇肅况升爲宮殿若復令分藩列邸者居此降爲王府有是理乎鄂爾泰在雍正年間卽爲大學士軍機大臣迨恭纂 實錄時伊復充總裁官 皇考諭旨鄂爾泰甯未之知乃復爲此奏其意不在見好於和親王乃在得時譽耳大臣居心豈宜若是見在鄂爾泰子孫式

微不能克家未必不由於此是 雍和宮必當改爲佛宇斷不可
作爲王府將來我子孫內有由藩邸紹承大統者並應永遠欽承
用昭法守此旨亦當繕錄二通分交上書房內閣同前旨一併存
記○停止鄉試覆試○命將安南內投之黎維治張廷眷入於黎
氏佐領下編管○賜安南國王阮光瓚敕諭日前據兩廣總督長
麟等奏安南國有呈進表文一件內稱徧查該國並無黎維治其
人黎氏宗族亦無奔逃之事恐係該國土目農福縉黃文桐餘黨
捏冒內投懇爲究查等語朕因命御前大臣福長安等詢之黎維
祁之母阮氏及黎維祁等亦稱伊近族弟兄並無名黎維治者是
爾前表非虛當經降諭嘉獎並令江南督撫將安插該省之黎維
治押解到京經朕令軍機大臣詳加研訊黎維治原名黎維溥曾
封瑤郡公實係黎維祁同會祖族叔並據開呈譜系支派甚爲明

晰隨令黎維祁之母及黎維祱與之當面識認彼此俱屬相識是
黎維溥之爲黎氏近支已無疑義朕撫馭中外一視同仁從前黎
氏臣服天朝百有餘年之久是以黎維祁母子內投時朕卽加恩
安插黎維治內投後已發江甯安插嗣經爾表稱恐係農福籍黃
文桐餘黨有捏冒情事是以令將伊等解京如審明捏冒屬實尙
欲發回爾國今旣問明黎維治原名黎維溥並非農黃二姓餘黨
亦無給還爾國聽爾處治之理其農黃二姓餘黨自必尙在爾國
爾可自行訪尋辦理其餘黎維溥手下之在安南人等作何處置
悉聽爾國辦理總之爾父受朕厚恩錫封王爵俾作屏藩爾繼守
先業惟當牧甯境宇益矢敬慎仰承恩眷黎氏近支見經天朝安
插亦無能復至爾國滋生事端爾可無庸呈慮爲此詳切訓諭爾
其祇承朕命倍加恭順毋墮前業以期常荷渥恩特諭○己卯諭

陳用敷著調補湖北巡撫所有安徽巡撫員缺卽著惠齡調補安徽距京較近因惠齡見有老親是以將伊調補以便就近迎養用示體恤

十一月己丑諭張承勳之高祖張勇前在軍前奮勉張謙張承勳又內廷行走多年著加恩准其所請將近派一支歸入正黃旗漢軍旗分○辛卯諭穆和蘭奏審明傳習邪教各犯分別定擬一摺止稱將續獲之李殿邦解交福甯提同宋之清質審而於劉之協一犯並未提及又該撫前次所奏馳赴扶溝查辦一節其行至何處如何查拏督緝有無蹤迹之處亦並無一語奏及竟欲將該省關提劉之協致乘閒脫逃情由希圖混過僅照陝省辦法將留豫審訊之案犯分別定擬具奏敷衍塞責卽所奏之摺以穆和蘭庸闇無能亦未必自能想到如此掩飾不過任聽幕友支飾繕寫思

以一奏顛預完事實不料其糊塗無福一至於此穆和蘭著再交部嚴加議處○癸巳諭福康安奏貴州按察使西成係伊教習清書之師例應迴避請旨酌調等語西成著調補湖南按察使其貴州按察使員缺卽著阿彰阿調補○甲午 上幸 皇十七子多羅貝勒永璘第○辛丑諭原任禮部侍郎胡煦苦志讀書究心理學著有周易函書採入四庫全書經部尙爲續學之臣從前因其官止侍郎例不予諡第念伊曾在上書房行走今伊子胡季堂用至刑部尙書胡煦已得尙書封典著加恩補行賜諡以示眷念著舊獎勵儒臣至意尋予諡文良○壬寅諭富綱來京陛見據奏伊母年屆八十懇請留京供職見在蘇凌阿於署兩江總督任內有緝拏邪匪要犯事件所有刑部尙書事務卽著富綱署理○癸卯諭軍機大臣等昨據蘇凌阿奏參革扶溝縣劉清鼐先經咨調來

江旋准穆和蘭來咨遵旨擊交刑部治罪添派廬鳳道刁玉成等護送起解等語所奏尙未明晰劉清龍疏脫要犯又復捏辭推諉蘇凌阿既已咨提到江亦應將該參員如何疏玩捏飾情形訊明具奏今摺內並未提及或係該參員未經提到旋准豫省咨會速卽解京不及見面親鞫僅添派人員迎解但有此等情節摺內何以並未聲明殊屬含混著傳諭蘇凌阿卽將因何未經訊供之處據實覆奏昨因富綱面奏親老留京已降旨令其署理刑部尙書蘇凌阿仍署兩江總督事務但兩江統轄三省事務殷繁朕觀富綱才具恐其不能勝任且從前書麟在兩江任內惟知自守屬員無所畏懼地方必有貽誤之事若令富綱前往仍與書麟無異實不足以資整頓蘇凌阿雖年屆八十而精神尙好且伊歷任江南道府於該省情形尤爲熟諳著傳諭蘇凌阿務宜實力振作不特

緝拏劉之協一事關緊要卽地方一切事務總當認真督率加意整飭俟辦理果有起色彼時朕或念其年老再行簡員前往換伊回京供職亦未可定此時斷不可存五日京兆之見致負委任一切勉力妥爲整頓○甲辰諭前因邪教案內要犯劉之協另案關提至河南扶溝縣乘閒脫逃已降旨將穆和蘭拔去花翎並與藩臬兩司及該管道府一併嚴加議處矣邪教一案自福康安奏承恩奏到降旨交河南等省通緝已將數月該省地方官豈尙未聞知况劉松一犯經甘肅究明具奏豫省爲劉松原籍並據穆和蘭先行查出咨會甘省查辦劉之協係與劉松倡復邪教之人穆和蘭早應通飭所屬留心訪緝况扶溝縣卽有拏獲邪教匪犯劉之協既關提到案字音相同正當從此根究何得置若罔聞疏縱怠玩以致要犯潛逃卽此一端可見穆和蘭平日於地方公務廢

弛已極且伊才具亦屬平常斷不可再留封疆之任穆和蘭著卽革職發烏魯木齊效力贖罪交與宜縣差遣委用其一應得項不准支領以示懲儆所有河南巡撫員缺著阿精阿補授此旨交阿精阿齎往豫省向穆和蘭傳知後卽令其由該省起身前往不許來京藩司吳璥臬司陳文緯亦先著摘去頂帶令其戴罪緝犯並著阿精阿傳知該司等務宜分投認真查緝以期要犯速獲稍贖重咎所有該管道府俟已革扶溝縣知縣劉清鼐解京訊明後再降諭旨○丙午諭宜興著補授刑部右侍郎所有奉天府尹事務著伯麟兼管至盛京刑部侍郎員缺著傅森調補所遺盛京工部侍郎員缺著泰甯補授○戊申諭朕恭閱 世宗憲皇帝實錄內載欽奉 諭旨以督撫提鎮因公接見自有一定之禮儀不應過卑過亢乃閒有督撫倨傲妄行而提鎮等遂卑躬屈節以爲諂媚

者如年羹堯之視提鎮等如同奴隸每令披執進見常飛在江南時令兩司侍立於旁妄誕不法會經嚴切訓飭方今綱紀整肅督撫等接見提鎮藩臬自不敢似此倨傲妄行但奉行日久因公晉接時或有不遵頒定儀注妄自尊大者特此再行申諭該督撫等務須遵循定制倍加謹慎提鎮及兩司等亦當各知自重不得過爲卑屈以肅官常而昭體制○諭向來督撫委署藩臬兩司者其人俱將接任日期具摺陳奏但此等委署人員所奏之摺不過尋常交代等事並無緊要嗣後除奉旨署布按之人外其督撫奏委者若關繫地方緊要及所管事務查有弊端或有應行調劑事件准其專摺陳奏其餘不過尋常接收交代到任日期等事止須呈報督撫咨部存案均毋庸專摺具奏以歸覈實

十二月丙辰諭前因六十年乙卯元旦日食上元月食雖薄蝕躔

度可以豫行推測所謂千歲日至可坐而致但稽古史傳所載遇有日食月食等事往往下詔求言以示修省朕思上天垂象固宜戒慎而應天以實不以文與其託諸空言孰若施諸實政前已降旨普免天下應徵漕糧俾海宇子民共臻樂利今思各省尙有節年民欠及因災帶緩未完銀穀俱應按限徵輸者小民究因官欠未清未得遂其含哺之樂朕仰邀 昊眷六十年寰宇甯謐景運增隆丙辰年卽屆歸政今若於朕臨御之年覃敷恩資俾小民節年欠項廓然一清得以尸慶盈甯共游化宇所謂修德愛民孰大於是而修刑亦槩於是矣以此上應垂象感召休和實屬吉祥盛事所有各省節年正耗民欠及因災緩徵帶徵銀穀著各督撫詳晰查明按照各省所屬之某州某縣實欠在民銀穀若干速行開單具奏到日降旨豁免並著先將此旨謄黃宣示俾鄉村鎮市

咸使周知得以共霑實惠官吏胥役等無從影射侵冒以副朕子
惠黎元敷錫延禧俾普天羣黎無一負欠者喜孰大於是該部卽
遵諭行○癸亥專立四川秀山縣學額○乙丑以那彥成爲內閣
學士

由詹事選

○丙寅移漳州城守營駐埔頭汛○丁卯諭軍機大臣

等昨日畢沅呈進貢品內有恭錄御製上元燈詞燈八件外隨冊

葉二本貯在青玉盒內茲偶取閱冊內所載巽卦至未濟八首係
朕豫作六十年上元燈詞朕幾餘適興豫行吟詠於今年冬至月
半閒始發交王杰錄出俟明年上元方寫入詩本者外閒何以早
得傳播鈔寫製辦向來御製詩文俱係王杰一手謄寫卽使王杰
之子及家中門生幕客將燈詞私行鈔錄傳出或爲事之所有至
冊末所書卽係明年燈詞御製序文而冊內又書寫在後畢沅由
湖廣總督降補山東巡撫伊在湖廣任內有查辦邪教事件又自

楚前赴山東僕僕道途所進貢品亦必無暇自行製辦况此項鑄
詞雖造辦處就近製作亦不能如此之速自係有人在京代爲辦
貢以爲爭先出奇見好畢沅要其厚謝地步內廷行走翰林理宜
小心慎密從前康熙年間南書房翰林如徐乾學高士奇輩往往
有與外省勾結情事恭閱雍正年間實錄內亦以臣工等不知
謹慎屢加訓誡朕臨御以來於內外臣工從不存逆億之見且
辦理庶務大公至正亦無不可共見共聞者但以未經寫入詩本
之御製詩章遽爾傳播外間由此而推設遇有機密事件亦可豫
爲輕洩若高雲從之將道府記載私以告人者甚至無中生有若
從前查嗣庭鄒魯胡中藻之造言生事釀成巨案不可不防其漸
著傳諭畢沅將鑄詞序文得自何人係何人代爲承辦據實覆奏
朕不過欲明白此事並不加責備該撫亦不必心存畏懼稍有諱

飾致干咎戾仍卽據實覆奏○己巳諭軍機大臣等昨日畢沅呈進貢品內有恭錄御製鐙詞鐙八座又隨進冊葉二本偶取閱看所載巽卦至未濟八首係朕於冬至月初閒豫作六十年上元鐙詞發交王杰錄出俟明年上元方寫入詩本者外閒何以早得傳播鈔寫製辦本擬將鐙詞序文得自何人之處詢問畢沅茲令軍機大臣查詢畢沅差弁據稱係舉人劉在田在京代辦隨傳詢劉在田據稱係素識拔貢方楷給與底稿復詢之方楷據稱伊在彭元瑞家代筆因彭元瑞令其繕寫私行錄稿轉給劉在田圖其酬謝等語御製詩章外閒購求寶貴爭相傳錄固屬事之所有卽此次劉在田方楷私行鈔寫牟利止將伊等斥革示儆免其深究但彭元瑞於伊代筆之人私將底稿鈔錄轉給他人並未覺察設遇有機密事件亦似此私行傳播豈不大有關係彭元瑞不能慎密

之咎實所難辭嗣後當知謹慎至畢沅向來所進之貢不過尋常物件自可照常備辦何必另求新奇見好以致代伊辦貢之人因此多事著傳諭畢沅嗣後務須留心謹慎勿踵前轍轉令匪人藉端滋事致蹈愆尤也○壬申子故克勤郡王雅郎阿祭葬諡曰莊○丙子金簡卒以保甯爲吏部尙書由伊犁將軍遷○戊寅諭吏部尙書金簡供職年久勤慎小心前聞患病不時遣侍衛等往視並派御醫診治賞賜人參一斤俾資培補以冀速痊茲聞溘逝殊爲軫惜著賞給經被以爲飾終令典並派皇孫縣勲帶同侍衛十員前往奠醊所有應得卹典著該部察例具奏○壬午冊封婉嬪陳佳氏爲婉妃循嬪伊爾根覺羅氏爲循妃貴人林佳氏爲恭嬪陳佳氏爲芳嬪○是歲朝鮮荷蘭來貢○會計天下民穀數各省通共大小男婦三萬一千三百二十八萬一千七百九十五名

口各省通共存倉米穀四千五百萬三千三百九十七石二斗三升五合四勺